

Papru

TISARÚNIKIANMAYA SHUARAN

EMKA papín aar akuptukma

Papru ni tsaniakmarijjaj Yus-shuaran áatramiania nu

1 ¹Wikia Pápruitjaj. Wisha Serpanujaj tura Timiutéujaj Tisarúnikianmaya Yus-shuar ajasuitrumna nuna áatjarme. Atumsha Yus-shuar asarum Apa Yúsnaitrume, tura Uunt Jesukrístunuitrum. Ii Apari Yus, tura ii Uuntri Jesukrístu waitnentrana áarmatai, ti shiir imiatkinchanum pujustarum, tu wakerajrume.

Tisarúnikianmaya shuar Yus nekas enentáimtusar
umirkatniun jintintiarmiania nu

²Iisha Yus áujkurkia atumniasha tuke enentáimtusar Yus shiir yuminsaji. ³Atumsha Yus nekas enentáimtakrum umirkarumna nu nékaji. Núnisrumek, Yus aneakrum takaarme. Tura Jesukrístu tatí tusarum tuke tsawant nákarne. Nu neka asar, ii Apari Yus áujkur, nusha ashí enentáimsar áujtajrume. ⁴Yatsurú, Yus anenmarme. Anenma asa Winia arti tusa achirmakurmena nusha nékaji. ⁵Enentáimpratarum. Iisha Yúsa Uwempratin Chicham atumin ujakmajnia nusha aya chíchamjain tíchamji. Antsu nú arant, nu chicham nekasaiti tusar Yusa Wakaní kakarmarijjaj tímiaji. Tura átum péñker matsamsarat tusar atumjai pujusar shiir iruntrar wekasarmiaji. Nusha paant nékarne.

⁶Atumsha yamaikia íksarmek ii túramiaj nu, tura ii Uuntri Jesukrístu túramia nu túrarme. Itiurchat ajin Yus-Chicham umikiurme. Tura

wáitiatrumek Yusa Wakanj shiir enentáimtikramkui warasrum pujarme. ⁷Nu túrakrum ashí Masetúnia tura Akaya nunkanmaya Yus-shuarsha shiir wekasatin jintintiarme. ⁸Tuma asarum Uunt Yusa chichame ti ipiamparurme. Tuma asantai Masetúnia tura Akaya nunkanmaya shuar nuna nékainiawai. Tura nú nankaamas Yus nekas umirkarmena nuna ashí aents nékainiawai. Nuna nékainia ásar ii étserman atsumainiatsui. ⁹Antsu átum in péñker itiaamun nii íksan ujatmainiaji. Tura nuyasha ántar-yus enentáimtustin iniaisarum nekas iwiaaku Yus nekas enentáimtusrum umirkarumna nunasha ujatmainiaji. ¹⁰Tura nuyasha Yusa Uchirj Jesus jakamunmayan Yus iniantkimia nu, nayaimpinimaya tatí tusarum átum nákamuncha ujatmainiaji. Iis, Jesus Nínkiti Yusa kajetáirj tsawanri jeattana nuyá uwemtikrampratin.

Yus-chichaman paant ujakarmiania nu

2 ¹Atumsha nékarme, yatsurú, iisha ántar atumjín jeachmaji. ²Antsu itiurchat wáinkiaitiatar arantutsuk shiir Uwempratin Chichaman ujakmajrume. Iis, nuik Jiripius péprunam incha katsekramkarmiaji. Tura nú arant, ti itiurchat wáinkiamiajai. Túmaitiatan Yus yáintkui Yusa chichamen ujakmajrume. Nuka atumsha ti penker nékarme. ³Warí, iisha Yus-Chicham atumin ujakmiaj nu nekasauyi. Tura yajauch enentáimsan, anankatjarum tusan tíchamjarme. ⁴Antsu Yus in péñker enentaimturmas Uwempratin Chicham etserkatarum tusa akatrampramiaji. Tuma asantai núnisrik étseraeji. Túrash aya aents waramtikсатаi tusar étsertsuji. Antsu Nínki Yúsak ii enentáin nekartamin asantai, shiir enentáimtikсатаitsar túraji. ⁵Átumka nékarme, penkesha shífirmach chichasan anankachjarme. Nuyasha, kuit achiktai tusar ántar chichaschamji. Núnaka Yus nékawai. ⁶Iisha Kristu akatramurjntji. Tuma asar ni kakarmarjiaj akupkatin takakuji. Páchitsuk túramniauji. Túrash waantu ajastaj tíchamji. Nuyá atumsha tura chikichcha in waantu awajtamsataj tákuisha iikia nakitmiaji. ⁷Antsu uchi kuírchin ni nukurj péñker iis tsakatmana áintsarik iikia atumniaka shiir fismajrume. ⁸Iisha ti shiir aneajrume. Tuma asar Yus-Chicham ujaktai tusar ti wakerukmaji. Tura aya ujakar iniaisatin wakerukchamji. Antsu ii jákatniuitkiursha iniaisachaaji, atumín ti anea asarⁱ. ⁹Yatsurú, ii atumaj nu sumarmaktai tusar kakaram takakmasmaj nu ¿kajinmatkintrumek? Atsá. Nékarme. Iis, Yus-Chicham étserkur, tsawaisha káshisha takasmiaji. Nusha, akirkata, tijj tusar takakmasmiaji.

¹⁰Yatsurú, atumjai pujumiaj nuj iisha Yus wakerana nu túrimiaji, tura yajauch túrutsuk shiir wekasamiaji. Nujaj incha chikichkisha yajauch chichartamkatniusha atumiayi. Nuka atumsha nékarme tura nú arant Yus nékawai. ¹¹Tura atumniasha ankant ankant Yúsnum ikiakármajrumna nu nékarme. Tura uchin ni aparj átsankeana nútiksarik

shiir enentáimtikramajrumna nusha nékarme. ¹²Tura Yúsjaí shiir wekasatarum tímiajrumne. Yus nan̄kaamas uunt asa ashí akupeawai. Tura Yus-shuaraitrumna nuna, Winin pachiiinkiarat tusa, Yus untsurmarme. Yus untsurma asamtai Níniuiutrume. Niiniu asarum Yusa uchirja núnisrumek wekasatniutrume.

¹³Yus-Chicham ii étserma antukrum, aya áentsnumiānchaiti tímiarme. Yúsnumiāiti tímiarme. Nu tiniu asarum umirkamarme. Kame nekas tárume. Ii étserjinia nu nekas Yusa chichamēnte. Átum nu chicham umirka asakrumin, atumí enentáin kakaram ajastinian amaawai, Yus-Chicham asa. Átum Yus-Chicham umirkaru asakrumin iisha tuke tsawant Yus yúmiñkiaji. ¹⁴Yatsurú, ju nekaatarum. Aya atumek wáitiatsrume. Ashí Jutía nun̄kanam Israer-shuar, ni shuarin̄ketiat, Yus-shuaran wáitkiascharmakia. Iis, Yus-shuaran Kristu Jesusan umirkaru ásarmatai wáitkiasarmiayi. Yamaikia atumniasha atumí shuárin̄ wáitkiarmainiawai. Nujai Jutía nun̄kanmaya Yus-shuarjai métekrak ajasurme. ¹⁵Niisha Israer-shuaraitiatan̄ Yus-Chichaman etserin armia nuna nuamtaketiāt máawarmiayi. Tura nú weeák Uunt Jesusnasha máawarmiayi. Tura incha aa jiki akuptamkarmiaji. Maaj, niisha Yúsan shiir enentáimtikiainiatsui. Tura núnisan̄ ashí áentsun kajerainiawai. ¹⁶Warí, Israer-shuarcha Uwempratin Chicham ujaktaj tákurnisha niisha suritramainiaji. Nuna túruiniak yaunchu tunaan túriarmia nújain̄kia nan̄kaamas yamaikia túrawarai. Pai, túrasha yamaikia Yusa kajetairij imiá tsumaj ana nuí pujusarai.

Papru ataksha Tisarúnikianam irautajtsa wakerimiania nu

¹⁷Iisha, yatsuru, ishichik tsawant atumiya kanakir jeachat pujayatrik, atumjaisha wáinniaiyachiatrik tuke ii enentáinkia enentáimtimjarme. Tuma asar ataksha atumin iistai tusar ti wakerimji. ¹⁸Nekas winitiaitsar wakerimji. Imia wíkisha winitniun ti nukap enentáimsamjai. Tura iwianchi uuntri Satanás tuke nuna suritrammiaji. ¹⁹⁻²⁰Atumsha shiir wekasa asakrumin iisha ti shiir enentáimsar waraaji. Nu tuma asar Uunt Jesukristu tátintri shiir enentáimsar nákJai. Nii támatai imiá warastatji. Atumin Yus-shuar awajsa asar, Nii támatai atumsha iijiai Jesus shiir inkiuntatji. Tuma asamtai nu enentáimsar tawasap achiktinia áintsar waraaji.

3 ¹⁻²Iisha ataksha atumin íistaitsar ti wakerimji. Tura tujintiakur iikia Atenas péprunam juákur ii yachi Timiutéu atumin íirmainiarat tusar akupkatai, timiaji. Iisha Kristui Uwempratin Chicham etsermiaj nuí, Timiutéuka iijiai métek takasuiti. Tuma asa niisha Yusa takatrin takáa asa atumniasha Yusai kakartarum turamarti tusar akupkamji. ³Tura nú arant, itiurchatan wániuk iniaisarain̄ tusa ikiakátmararti tusar Timiutéu akupkamji. Yatsurú, átumka nékarme, ashí Yus-shuaraitjinia nuka

páchitsuk wáitsatniuitji. Iis, tuma asantai atumsha ti nekas ititurchatnum pujarme, Yus-Chicham umirka asarum. ⁴Iimiatarum, atumjaj̄ nuik tuke pujumjiniã nū “iisha wáitsartatji” tíchamkajrum. Iis, túrunachaik. Nuka nékarme. ⁵Tura atumin íwianch tunaanum ajunmarchariash tusan, wisha kúntuts enentáimsamijaj̄. Tura ánrar takaschaj̄iash tu enentáimsamijaj̄. Tuma asantai nekaataj tusan ti wakerakun, wisha ti nukap tsawant nákaschamijaj̄. Antsu wárik Timiutéun akupkamijaj̄. Yús̄jaj̄ péñkerash wekainia tusan, “nu inintrusam ikiuuta” timijaj̄.

⁶Tura yamaikia Timiutéu Tisarúnikianmaȳa waketki tayi. Niisha taa, átum Yus aneakrum shiir enentáimtamuncha ujatmaji. Tura átum in anenma asarum tuke enentáimsar pujamuncha tura ii atumin ístaitsar wakerajnia núnisrumek atumsha incha írmaitiai tusarum wakeramuncha Timiutéu ujatmaji. ⁷Tuma asantai, yatsuru, ashí ititurchat tura wáitsatin wáiniatrik átum Yus shiir enentáimta asakrumin iisha shiir enentáimji. ⁸Atumsha Yús̄jaj̄ tariara weká asakrumin, shuar jaa péñker ajas enentáí chinkiana áintsarik enentáimji. ⁹Yus péñker umirka asakrumin, iisha shiir waraaji. Warasu asar ii Yusr̄i ti yúm̄ñkijai. ¹⁰Incha Yus akuptamkurniñkia atumiin t̄imijaj̄iã jeartiai tusar wakeraji. Túrar Yusna nekaatin mash nékatsrum nu jintintiatai tusar tuke ti seaji.

¹¹Atumiin weri ístinian ii Apar̄i Yuss̄ha tura ii Uuntrī Jesukr̄stusha in yáinmaktai tusar wakeraji. ¹²Atumin ii aneajnia núnisan̄ Yus atumniasha mai anenai ajatniun tura chikichcha aneastinian enentáimtikramprartí. Tura nú nukap anenkrattain Yus amasartí tusar wakeraji. ¹³Yus ikiakátmakui átum tunáa túrutsuk Yus umirkarum wekasatarum tusar ii Apar̄i Yus seaji. Ii Uuntrī Jesus Níiniurij̄jaj̄i winiak péñker wekaarmin tati tusar taji.

Péñker túratniun Yus wakerana nu

4 ¹Iikia Uunt Jesus akupkamuitji. Tuma asar nu kakarmajaj̄ atumniasha jū túratarum tusan akupeajrume. Atumsha iwiaaku pujarmena nū Yus shiir waramtiksataram tura tuke péñker túrukum wetarum tusar seajrume. Iisha nuik atumin unuiniarmajrumna nútiksarmek túratarum. ²Uunt Jesusa akupeamurij̄jaj̄i tura nu kakarmajaj̄ atumniasha nuik unuiniarmajrumna nu átumka nékarme. ³Atumin Yus wakerutmarmena nu júiti: “Shuar aya Win̄in sumama pujusat tusan chikichkinkesha shuar tsanirmaashti”. ⁴⁻⁵Yus-shuarcha ainia nu, Yús̄an nékainiachu ásar, aya niñki enentáimtumasar aya ni ayash̄i wakeramunak umiktinian wakeruiniak nuwan enentáimtuiniawai. Atumsha núnisrumek túrawairap. Antsu atumsha atumí nuar̄i péñker enentáimtusrum shiir aneasrum ayastarum. ⁶Nú arant, amesha ame yatsum anan̄kam ni nuar̄i yajauch awajtusaip. Nu túrakrumniñkia ii t̄imijaj̄rumna nútiks̄an̄ Uunt Yus ti kakaram asutiámawartatui. ⁷Warí, Yus

incha pénkercha yajauch túratarum turamchaitji. Antsu aya pénkerak túratarum turamji. ⁸Tuma asamtai shuar ju chichaman nakitiakka áentsun nakitiatsui, antsu Yúsan nakitraití. Tura nu Yussha ni Wakanin amaawiti tunaan túrashtinian.

⁹Tura yamaikia nuamtak Yus-shuar aneniastin ana nuna ti neka asakrumin áatrashtatjarme. Warí, imia Niniki Yus atumin mai anenai ajatniun jintintramawarmatai nékarme. ¹⁰Iis nútiksarmek aneniatsrumek ashí Masetúnianam matsatainia nujai. Túrasha, yatsuru, atumí anenkrattairi nú nukap ajasti tusan, seajrume. ¹¹Yamaikia tímiaj nútiksarmek, yayauchin túruinia nuí wekatsuk, chíkich shuarna pachittsuk, atumí takatriin shiir ankant pujusrum atumí uwejejain takakmá pujutarum. ¹²Átum táasairum tusan tájarme. Túrakrumninkia atumniasha chíkich shuar pénker enentáimturmasartatui.

Kristu tátintri

¹³Yatsuru, Yus-shuarcha ni shuari jakamtai “atakka wáinkiashtatjai” tusa ti kuntuts enentáimainiawai. Tuma asamtai atumsha nútiksarmek kúntuts enentáimsairum tusan juna tájarme. Jákaru ainia nu urukawartinkit paant nekaatarum. ¹⁴Jesus jákayat nantakchamkia. Núnisan Yus Jesusan iniantkin Nin umirkar jákaru áiniana nunasha iniantkittiawai. Paant nékaji nusha. ¹⁵Tuma asamtai Yus-Chicham nekaprutamnia nuna atumniasha jintintiajrume. Iisha tuke iwiaaku pujarin Kristu táakuisha jákaru ainia nuka ikiuakur émkishtatji. ¹⁶Antsu Yus akupeakui, Yusa suntarí uuntri untsumkui tura Yusa kachurin umpuarmatai Uunt Jesukristu untsumuk Yus pujamunmaya tarattawai. Nuinkia Krístunu ajarar jákaru áiniana nu iwiarsumunmaya nantakiartatui emka. ¹⁷Tura nuyá iisha Yus-shuar tuke iwiaaku pujajnia nu Krístujai yuranminiam ajapén inkiunaikiartatji. Nuní ashí nayaimpiniam ii Uuntri Jesukristujai tuke iwiaaku pujusartatji. ¹⁸Tuma asamtai ju shiir chicham atumin ujakjana jujai mai ikiakánai ajatarum.

5 ¹Túrasha, yatsuru, ni tátintri waritin tura warí tsawantai, nuka áatratin atsumatsrume. ²Ni tátintri júnis átin nékarme. Kiritniunam kasá shuar kasamkataj tusa tátatna nu nekaachminiaiti. Núnisan nákatsuk pujuinia Uunt Kristu tsawantri jeattawai. ³Ashí shuar “Pai, yamaikia ti nekas shiir pénker pujuinaiji” tu matsatainiaj, aya aneachma nunka mesertin tsawant jeattawai. Nuwá ajamtin aya aneachma jatema áintsan, nékachmanum átatui. Túmakui pisartin penké atsuttawai. ⁴Túrasha, yatsuru, átumka ujakmaitrume. Nu tsawant atumsha aneara pujarmin jeattawai. Atumsha aneara pujá asakrumin kasá áintsan tarutrámashatui. ⁵Enta, átumka tsáapninium wekáa asarum Yus-shuarmeka nékaitrume. Iikia kiritniumianchuitji. ⁶Nu tuma asar, chíkich uruka núnisrik, ii enentáin kanartinia núnisrik

“Warí, winia itiurtawa” tíchami. Antsu naka enentáimsar anearmi. 7Iis, kashi kanarchatniukait. Tura nampeena nu kashi nampeenawai. 8Túrasha iikia shiir tsáapninium wekainiaj nuka naka enentáimprar tuke nampetsuk pujustiniaitji. Suntar ni nemasrj anan̄kruawaj̄n tusa anear wekasatniuiti. Tura iisha núnisrik íwianch yajauch awajtamsaj̄j tusar anearmi. Yus enentáimtusar aneetniuitji. Tura núnisrik iisha, ju nun̄kanmaya uwemprar Yúsaj̄ tuke pujustatji, tu enentáimprar wetái. 9Páantchakait. “Jinium wéchatniuitrume” Yus incha túramji. Antsu ii Uuntrj̄ Jesukrístujaj̄ uwempratniun tsan̄katramkaitji. 10Nijijaj̄ métekrak iwiaaku ami tusa Jesukrístu in jarutramkamiaji. Nu tuma asantai iisha ii ayashijaj̄ iwiaaku pujakrishá Nijijaj̄ iwiaakji, tura ii ayashijaj̄ jáakrishá Nijijaj̄ tuke iwiaakji. 11Tuma asantai tuke túrarmena núnisrumek, shiir enentáimtiknaisarum mai ikiakánai ajatarum.

Papru Yus-shuaran jintintiamiania nu

12Yatsurú, juna seajrume. Atumjaj̄ pujuinia nú shuar Yúsnan takakmainiakui shiir enentáimtustarum. Jintintramuk chichartamainiakui umirkatarum. 13Yúsnan takainia ásarmatai ti péñker enentáimtusrum aneestarum. Tura yajauch awajnaitsuk ti shiir nawamnaikiarum matsamsatarum. 14Tura junasha seajrume, yatsuru. Takastinian nakitiana nusha chicharkatarum. Tura yaweena nusha ataksha enentáimtikrarum ikiakártarum. Kakarmachu ana nusha yáintarum. Tura ashí shuarjaj̄ kajetsuk katsuntrarum wekasatarum.

15Aneartarum, yatsuru. Chíkich yajauch túrutmamtai amesha nútiksamek yapajkiaip. Antsu nuka túrutsuk átumka mai péñker awajnai ajatarum. Tura nú arant, ashí nun̄kanmasha ashí shuarsha nútiksarmek túratarum. 16Tuke shiir warasrum pujustarum. 17Tuke tsawant iniaitsuk Yus áuj̄satarum. 18Péñker pujakmesha, itiurchat pujakmesha ashí warí wáiniam nujsa Yus shiir yum̄nsatarum. Kristu Jesusaj̄ Yus-shuar ajasutiram nu túratniun Yus wakerawai.

19Ji ikiajniaktinia núnisan̄ Yusa Wakanj̄ enentáimin keana nuka tunaajaj̄ téenmamtikiarum ikiajniakairap.

20Yus jintintrar akupkamu asa péñker chichaman etserainia nu nakitirairap.

21Ashí etserkamu ana nu nekasashit tusarum nekaatarum. Túrarum aya péñker ana nuke achiktarum. 22Ashí yajauch ana nuyanka kanaktiarum.

23Yuska, imiatkinchanum wekasatin amaana nu, atumin takamtsuk shiir awajtamsartí. Tura ii Uuntrj̄ Jesukrístu táatsaj̄n, atumí wakanj̄ atumí enentaj̄ tura atumí ayashishá mash métek tunaajaj̄inchu awajtamsati. 24Yus atumin untsurmakmarumna nu tímianak uminiaiti. Nii tana nuna yawetsuk túrattawai.

Amuamunam amikmaatin

²⁵Ashí yatsurtiram winiasha Yus áujtursatarum. ²⁶Ashí Yus-shuar árum nu, amikmaaniatarum. ²⁷Winia Uuntru Jesukrístu chichamejají juna tájarne. Ju papí ashí Yus-shuar antukarti tusarum ashí iruntramunam áujtsatarum. ²⁸Ii Uuntri Jesukrístu atumin yáinmákartí. Nu atí.